

www.BibleForChildren.org

Ore i mexũ
ga Matéu
ümatüxũ 26



Rü 6 ga ngunexũ
naxũpa ga
Üpetüchigaarü peta,
rü Ngechuchu rü
Betániawa naxũ. Rü guma
ĩane nixĩ ga nagu naxãchiũne
ga Lácharo ga Ngechuchu
wena namaxẽęcü. Rü
yexguma ga María rü
yéma inange ga 300 gramu nagu
ga pumara ga nardo ga tatanüxũ.
Rü Ngechuchuxũ namaxã iyixcutü. Rü ñuxũchi
ngĩyaemaxã ínapicutü. Rü guxũwama ga gumá
ĩpata rü nayixmachĩã namaxã ga yema pumara.



Rü Yúda ga Icharióte ga wüxi ga yema 12 ga
ngúexũtanũxũ ixĩxũ, rü Yudíugüarü chacherdótegüarü
ãëxgacügütanüwa naxũ nax namaxã
yamexëëãxũcax nax ñuxãcü tá
Ngechuchuxũ yayauxgüxũcax.
Rü yexguma yemaxũ
naxĩnüegu, rü nümagü ga
yema ãëxgacügü
rü nataãëgü.



Rü diëru Yúdana ngĩxũ naxuaxũgü. Rü yexgumama
inanaxügü ga Yúda ga naxcaḅ nax nadauxũ ga ñuxãcü
nũxũ nax natauxchaxẽẽgüãxũ
nax duũxũgüechita
Ngechuchuxũ
yayauxgũxũcaḅ.



Rü yéma naxĩ ga yema norü
ngúexũgü. Rü yema Ngechuchu
namaxã nüxũ ixuxũrũxũ nanaxügü.
Rü nanamexẽxẽgü ga yema õna ga
Üpetüchigaarü petagu tá
nangõxgüxũ. Rü yexguma
ínachibüeyane rü Ngechuchu
nanayaxu ga wüxi ga paũ. Rü
Tupanana moxẽ naxã, rü
inanabücu, rü norü
ngúexũgüxũ
nayanu. Rü
ñanagürü:
—¡Penayaxu rü
penangó!




Ñaa rü chaxune nixĩ — ñanagürü.
Rü ñuxüchi nanayaxu ga wüxi ga
copu ga bínumaxã ããcuxũ. Rü
Tupanana moxẽ naxcaḡ inaxã. Rü
ñuxüchi norü ngúexügüna nanaxã, rü
ñanagürü nüxũ: —¡Guxãma i pema rü
ñaa copuwa peyaxaxüḡ ya bínu!
Erü daa bínu rü chaugü nixĩ.



Rü yimámaxã Tupana duñxügüxũ
nanawex nax aixcũma yixĩxũ i
norü uneta. Rü yimá chaugü rü
muxũma i duñxügücax nixĩ i
nabaxũ nax Tupana nüxũ nüxũ
irüngümaxũcax i norü pecadugü.




Rü Pedruxũ ñanagürü ta ga Cori ga Ngechuchu: —Pa
Chimóũx, Pa Chimóũx, Chataná rü Tupanana naca nax
ñoma triguxũ idüagüxürüxũ pemaxã yixĩxũcax. Natürü
choma rü Chaunatüxũ cuxcax chacaaxũ nax tama nüxũ
curüxoxũcax nax cuyaxõxũ. Rü ngẽmacax i cumax, Pa
Pedru, rü ngẽxguma chauxcax cutaeguxgu, rü
chanaxwaxe i nüxũ
curüngüxẽxẽ i
cumücügü nax
tama nüxũ
naxoexũcax nax
yaxõgüãxũ
— ñanagürü.



Rü ñanagürü ga Pedru: —Pa Corix, choma rü marü íchamemare nax wüxigu cumaxã nax chapoxcuxũ rü ěxna wüxigu cumaxã nax chayuxũ — ñanagürü.

Natürü Ngechuchu rü ñanagürü nüxũ: —Pa Pedrux, cumaxã nüxũ chixu rü ñomatama i chütaxũgu naxũpa nax ota icaᵗaxũ, rü cuma rü tomaepüxcüna tá nüxũ quixu nax tama choxũ cucuáxũ — ñanagürü.



Rü Ngechuchu rü norü
ngúexũgũmaxã nawa
nangugü ga wüxi ga
nachica ga Yechemanígu
ãégaxũ. Rü Ngechuchu
rü ñanagürü nüxũ: —¡Nua
perütogü! Rü paxa yoxni
yéa chayayumüxẽ
— ñanagürü.



Rü norü yumüxēwa rü
ñanagürü: —Pa Chaunatüx,
cuxcaḡ rü guxũma
natauxcha. ¡Rü nüxna
choxũ ínanguxuchixēxē
i ñaa ngúxũ i tá chauxcaḡ
ínguxũ! Natürü chanaxwaxe
i curü ngúchaũ cuxü rü
tama i choxrü — ñanagürü.



Rü yéma nangu ga Yúda namaxã ga ñuxre ga
churaragü rü ñuxre ga Tupanapata ga taxũnearü
purichíagü ga yéma namugüxũ ga chacherdótegüarü
ãëxgacügü rü Parichéugü. Rü nixãxne,
rü yéma nanangegü ga omügü.
Rü wüxi ga Ngechuchuarü ngúexũ
rü chacherdótegüarü
ãëxgacüarü duũxũxũ
nanapixëxë, rü íanadae ga
norü tügünepachinü. Natürü
Ngechuchu rü ñanagürü:
—¡Ngexrüma nax pegü namaxã
pedaixũ! — ñanagürü. Rü
yexguma ga Ngechuchu rü yema
yatü ga ídaepachinüxũxũ ningõgü,
rü nanamexëxë.



Rü Ngechuchuxũ niyauxgũ, rü chacherdótegüarü
ãẽxgacüpatawa nanagagũ. Rü Pedru rü nawe narũxũ,
natürü yáxũguma nüxũ nixũchigũ. Rü yéma
chacherdótegüarü
ãẽxgacüpataaxtüarü
ngãxũwa, rü purichíagũ
nanaxügũ ga wüxi
ga üxü. Rü nüxũ
ínachomaeguãchi.
Rü Pedru rü ta
yéma natanüwa
narüto.



Rü yéma nayexma ga wüxi
ga chacherdótegüarü
ãëxgacüarü duũxũ. Rü
yema rü Pedru
ídaechinüxũtanüxũ nixĩ.
Rü Pedruna naca, rü
ñanagürü: —¿Tama ëxna
cuma yixĩxũ ga nanetünecüwa
Ngechuchumaxã cuxũ
chadauxũ? — ñanagürü. Rü
Pedru rü wena tama nügü nixu.
Rü yexgumatama nica ga ota.
Rü yexguma ga Pedru rü
ínaxũxũ ga yéma.
Rü poraãcüxüchi naxaxu.



Rü guxũma ga yema ãẽxgacũgũ rü
inachigũ, rü ãẽxgacũ ga Rómacũãx
ga Pirátuxũtawa Ngechuchuxũ
nagagũ. Rü yexguma ga Pirátu rü
Ngechuchuna naca rü ñanagürü:
—¿Cuma quixĩxũ i
Yudíugüarũ ãẽxgacũ?
— ñanagürü. Rü Ngechuchu
nanangãxũ rü ñanagürü:
—Ngẽma nüxũ quixuxũ chixĩ


i chomax — ñanagürü.



Natürü ga Pirátu rü wenaxarü
duñxügümaxã nidexa, yerü nüma rü
Ngechuchuxũ ningéxchaũ. Natürü
ga nümagü rü yexeraãcü aita naxüe
rü ñanagürügü: —¡Curuchawa
yapota! ¡Curuchawa
yapota! — ñanagürügü.




Rü yexguma ga Pirátu rü yema
Yudíugüna Ngechuchuxũ namu nax
curuchawa yapotagüãxũcaḡ. Rü
nūmagü rü nayagagü. Rü ínaxũxũ ga
Ngechuchu, rü norü curucha ngĩxũ
ininge. Rü nachica ga “Duẽxẽerugu”,
ãégaxũwa naxũ. Rü yema nachica rü
Górguta nixĩ ga naéga ga
Yudíugügawa.



Rü yéma curuchawa Ngechuchuxũ
nayarüpotagü. Rü Ngechuchurüxũ
curuchawa nayapotagü ga taxre
ga to ga yatügü, rü wüxi ga
norü tügü necüwawa
rü to ga norü
to_xwecüwawa.



Rü ga üaxcü rü nixo. Rü Tupanapata ga taxũnearü
tüyemachiũxũ rü ngãxũgu narügáute. Rü yexguma ga
Ngechuchu rü poraãcü aita naxü rü ñanagürü: —Pa
Chaunatüx, cuxmexwa chanangex
i chauãxẽ — ñanagürü. Rü
yema ñaxguwena rü nayu.



Rü yexguma marü nachütachaũgu
ga yema ngunexũ ga Yudíugü nagu
nügü imexẽẽgüxũ naxcaḡ ga
ngũxchigaarü ngunexũ, rü
noxtacüma Pirátuxũtawa
naxũ ga Yúche ga
Arimatéacüãḡ. Rü
gumá Yúche rü
Yudíugüarü

ãẽxgacügütücümüwa
naxü, rü natanüwa ga
yema ãẽxgacügü rü
poraãcü tachigacü
nixĩ. Rü nüma rü ta
ínananguxẽxẽ nax
Tupana norü ãẽxgacü
yixĩxũcaḡ.



Rü Pirátuxũtawa naxcaḡ ínayaca ga
Ngechuchuxũne. Rü yexguma ga
Yúche rü naxcaḡ nataxe ga
wüxi ga naxchápenũxũ ga
línuchinaxcaḡ. Rü
curuchawa nanaxüe ga
Ngechuchuxũne, rü
yema

naxchápenũxũmaxã
nananuque. Rü wüxi
ga nuta ga tacü ga
ũpaacü yacaxmaũcügu
nayanaxücuchi. Rü
ñuxũchi wüxi ga nuta
ga tacümaxã
nanangutaũ.



Natürü moxũãcũ ga ngũxchigaarũ
ngunexũgu rũ yema
chacherdótegũarũ
ãẽxgacũgũ rũ Parichéugũ
rũ Pirátuxũtawa naxĩ.



Rü ñanagürügü nüxũ: —Pa Corix,
nüxna tacuaxãchie ga yema yatü ga
Ngechuchu ga
idorataxãxũ rü yexguma
namaxũgu rü ñanagürü
tomaxã: “Ngẽxguma
chayuxgu rü
tomaepüx i
ngunexũguwena rü
wena

táxarü
ícharüda”,
ñanagürü
tomaxã.



Rü yema churaragümaxã yéma naxĩ,
rü meama nayataixẽẽgü
ga gumá nuta ga
Ngechuchumaxũ
namaxã rüngxtaũcü.



Rü nanaxüarü cuaxruñãxgü nax
taxúema naechita
ínaxügachigüxũcax ga
gumá nuta. Rü ñuxüchi
yexma nanamugü ga
churaragü nax
nüxna
nadaugüxũcax.



Rü ngũchigaarü ngunexũguwena ga
yüxüarü paḡmama, rü yéma
naxmaũwa íiyadaugü ga María
ga Madarénacüãḡ rü nai ga
María. Rü ngürüãchi
poraãcü
naxĩãḡchiane, yerü
wüxi ga daxũcüãḡ
ga Cori ya

Tupanaarü orearü
ngeruxũ ínarüxĩ,
rü naxmaũwa nangu
rü ínananguxgachi ga
gumá nuta ga namaxã
nangũxtaũcü ga yema
naxmaxũ.



Rü ñuxūchi gumá nutaétüwa
narüto. Rü yexguma yemaxū
nadaugūgu ga churaragū
rü norū muūmaxã
niduxruxe, rü yexma
niyuãchitanü.



Rü yexguma ga yema orearü
ngeruxũ, rü ñanagürü ngĩxũ ga
yema ngecügü: —¡Taxú i
pemuũexũ! Choma nüxũ
chacuax rü naxcax
pedaugü ya
Ngechuchu ga
gumá curuchawa
yapotagüãcü.



Nataxuma i nua, erü marü wena
namaxü, yema nüma üpa pemaxã
nüxü yaxuxürüxü. ¡Rü nua
pexĩ, rü ípeyadaux i
naxmaxü i ngẽma
inaxügüãxüwa
ga naxüne!



Rü yexguma ga yema ngecügü rü
paxãma nüxna íiyaxĩ ga yema naxmaxũ.
Rü imuũẽ, natürü itaãẽgü ta. Rü
poraãcü ixũãchi nax
Ngechuchuarü ngúexũgümaxã
nüxũ nax yanaxugüexũcaḡ ga
yema ore ga daxũcüãḡ
ngĩmaxã nüxũ ixuxũ.



Rü yexguma inaxũãchiyane, rü ngürüãchi
yéma ngĩxcaḅ nangox ga Ngechuchu,
rü ngĩxũ narümoxẽ. Rü ngĩmagü rü
Ngechuchucaḅ iyabuxmü rü nüxũ
iyacuaxüügü, rü naparawa
inaixãchitanü.



Rü yemawena ga Ngechuchu rü naxcaḡ nangox ga yema 11 ga norü ngúexũgü ga yexguma mechawa ínachibüeyane. Rü nayangagü naxcaḡ nax tama aixcüma yaxõgüãxũ rü tama nüxũ inaxĩnüexũ ga yema marü nüxũ daugüxũ. Yerü nümagü ga yema ngúexũgü rü tama nüxũ nayaxõgüchaũ ga yema nüxũ daugüxũ ga marü wena nax namaxũxũ. Rü nüma ga Cori ga Ngechuchu rü yexguma norü ngúexũgümaxã yadexaxguwena, rü Tupana rü daxũguxũ ga naanewa nanaga. Rü Tupanaarü tügü necüwawa nayarüto.



Rü Tupana rü
poraãcũ nũxũ
nangechaũ i ñoma i naanecũãx i
duũxũgũ. Rü yemaca_x inanamu ga Nane
ga nũgũmaxã wũxicacũ nax guxãma ya
texé ya nũxũ yaxõgũxe rü tama
itarũtauxexũca_x rü tũxũ
nangẽxmaxũca_x i maxũ
i taguma gũxũ.



Popera ga Rómawa yexmagüxü ga yaxögüxütanüwa
namuxü ga Pauru 3:23 Rü guxãma rü pecadu taxü rü
ngẽmacax nüxna tayáxügugü ya Tupana ya üü necü.

Popera ga Rómawa yexmagüxü ga yaxögüxütanüwa
namuxü ga Pauru 6:23 Rü natanü i ngẽma pecadu tüxna
ãxü, rü yu nixĩ. Natürü ngẽma ãmare ya Tupana tüxna ãxü
rü maxü i taguma guxü nixĩ i ngẽxguma tórü Cori
ya Ngechuchuaxü yaxögügu.

Popera ga Yudíugü ga yaxögüxücax ümatüxü 9:27 Rü
ngẽxgumarüxü nax wüxicanatama nayuexü i duüxügü rü
ngẽmawena Tupana tá nüxü nicagü, rü yexgumarüütama
ga Cristu rü wüxicanatama nügü inaxã rü nayu nax
naxütanüxücax i muxüma i duüxügüarü pecadugü. Rü
nüma ya Cristu rü wena tá núma naxü, natürü tama
pecaduarü ütanüwa. Rü tá núma naxü nax
namaxẽxẽãxücax i guxüma i duüxügü
i aixcüma ínanguxuxẽëgüxü.



Popera ga Epéchiuwa yexmagüxũ ga yaxõgüxũtanüwa
namuxũ ga Pauru 2:8,9 Rũ Tupanaarũ ngechaũgagu
penayaxu i maxũ i taguma gúxũ yerũ peyaxõgũ. Rũ ngẽma
maxũ rũ tama pegünatama penaxã, natürũ Tupana nixĩ ga
pexna naxãmarecũ ga yema. Rũ tama taxacũ i mexũ i
pexüxũgagu nixĩ i pexũ nangẽxmaxũ i ngẽma maxũ, natürũ
Tupana nixĩ ya pexna naxãmarecũ nax ngẽmaãcũ
taxúema tũgũ icuaxüxũxũcax.

Popera ga Rómawa yexmagüxũ ga yaxõgüxũtanüwa
namuxũ ga Pauru 10:9,10 Erũ ngẽxguma cuaxmaxã nüxũ
quixuxgu nax curũ Cori yixĩxũ ya Ngechuchu, rũ ngẽxguma
cuyaxõxgu nax yuwa Tupana ínadxẽẽxũ, rũ tá cuxũ
nangẽxma i maxũ i taguma gúxũ. Erũ ngẽxguma
Ngechuchuaxũ yaxõgũgu nixĩ nax Tupanapexewa imexũ.
Rũ taaxmaxã nüxũ tixu nax tórũ Cori yixĩxũ ya Ngechuchu,
nax ngẽmaãcũ nayaxüxũcax i maxũ i taguma gúxũ.



Ore i mexũ ga Cuáũ ümatũxũ 3:16,17 Rũ Tupana rũ poraãcü nüxũ nangechaũ i ñoma i naanecüãx i duũxũgũ. Rũ yemaca_x inanamu ga Nane ga nügũmaxã wüxicacũ nax guxãma ya texé ya nüxũ yaxõgũxe rũ tama itarũtauxexũca_x rũ tüxũ nangẽxmaxũca_x i maxũ i taguma gúxũ. Yerũ ga Tupana rũ tama ñoma ga naanewa nanamu ga Nane nax poxcu duũxũgũmaxã naxueguxũca_x. Natürũ núma nanamu ga Nane nax duũxũgũxũ namaxẽxẽxũca_x.

Nüxíraxũxũ ga popera ga Cuáũ ümatũxũ 5:11-13 Rũ yema Tupana nüxũ ixuxũ ga ore nixĩ nax nüma rũ tüxna naxããxũ i maxũ i taguma gúxũ. Rũ ngẽma maxũ i tüxna naxãxũ rũ Nanegagu tüxũ nangẽxma. Yíxema nüxũ yaxõxe ya Tupana Nane rũ tüxũ nangẽxma i ngẽma maxũ i taguma gúxũ. Natürũ yíxema tama nüxũ yaxõxe ya yimá Tupana Nane rũ tama tüxũ nangẽxma i ngẽma maxũ. Pa Chauenexẽgũx ya Tupana Naneaxũ Yaxõgũxex, pexca_x chanaxümatũ i ñaa ore nax nüxũ pecuáxũca_x nax pexũ nangẽxmaxũ i maxũ i taguma gúxũ.



Ore i mexũ ga Matéu ümatüxũ 26-28; Ore i mexũ
ga Luca ümatüxü 22-24; Ore i mexũ ga Cuáũ
ümatüxũ 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Ticuna Bible (tca) © 2022, Wycliffe Bible Translators, Inc. All
rights reserved.

<https://www.bible.com/bible/289/GEN.1.TCAP>

©2025 Bible for Children, Inc.

www.M1914.org

www.bibleforchildren.org

